

按粵疏稿

保留方面給由疏

題爲保留給由方面官員事據廣東按察司經歷
司呈奉本司帖文蒙臣批據布政司提督糧儲
副使兼右叅議劉毅呈詳叁年考滿緣由蒙批
按察司查報依經行准該道關稱本職見年伍
拾肆歲浙江紹興府山陰縣人由進士萬曆拾
捌年陸月初授刑部貴州司主事拾玖年叁月
丁父憂貳拾貳年肆月復除本部山西司主事
貳拾肆年正月調兵部武選司主事貳拾陸年

參月陞本部車駕司員外郎本年捌月陞山東
提學僉事貳拾玖年伍月陞福建布政司右叅
議參拾壹年陸月陞本省按察司副使以齎捧
未任參拾貳年參月丁母憂參拾伍年

人計以原任叅議調簡參拾柒年玖月調補廣東布
政司右叅議參拾捌年貳月貳拾伍日到任肆
拾年伍月內陞授今職本年陸月初參日到任
肆拾壹年肆月內蒙巡按廣東監察御史王以
寧薦舉壹次續蒙議委齎捧赴京事畢回任扣

至肆拾叁年伍月初貳日連閏共計實歷俸叁
拾陸箇月叁年考滿例應給由竝無違礙移文
考覈轉詳等因到司該本司按察使董肇胤看
得提督糧儲副使兼右叅議劉毅才略風霆比
迅操持冰玉同清籌畫計周軍國之需咸賴藩
屏績懋鎖鑰之望獨隆稱職准給由但該道職
專糧儲責任頗重難以離任相應保留准令接
俸管事等因到臣卷查先爲酌議考課之法以
肅吏治事奉都察院勘劄准吏部咨該本部題

議今後在外考滿方面府佐照舊赴京有事地方照舊保留聽撫按官從公考覈賢否具

奏先令復職管事牌冊差人齎繳其稱職經薦應得

誥勅命者照例

請給等因嘉靖肆拾貳年拾貳月內題奉

世宗皇帝聖旨是欽此備劄前來節經通行欽遵在
卷今據前因該臣會同總督兩廣軍務兼巡撫
廣東地方兵部右侍郎兼都察院右僉都御史

今陞南京刑部尚書候代張鳴岡從公考覈得
廣東布政司提督糧儲副使兼右叅議劉毅飲
露餐霞勁節追風逐電長才嶺海功高斗山望
重稱職但本官職司督理通省糧料難以離任
所據該司議呈保留相應題

請伏乞

勅下吏部再加查議合無行令副使劉毅免其赴京
將行過事蹟徑自造冊差人齎繳赴部考覈惟
復別奉

定奪緣係保留給由方面官員事理未敢擅便爲此
具本專差承差陳吉臣齎捧謹題請

旨奉

聖旨吏部知道

總鎮養病疏

題爲鎮臣病勢甚深求去情詞甚迫謹據實代

題乞

俯准放歸仍

速賜推補以重軍旅事據廣東布政司經歷司呈奉
本司劄付開稱蒙臣案驗准鎮守廣東總兵王
鳴鶴手本移稱本鎮原籍東北歷任西南風氣
未宜水土難服頃因海南黎變遵

旨督兵渡海至日伐山開路撫熟招叛催造器藥建

築營壘拮据三月始得就緒十日之內蕩平羅
活抱由二險寨奈本鎮犬馬微軀奔走疆場歷
叁拾年所心血精力已竭僅存軀殼今復歷瘴
鄉半載疾病轉加耳目聾聵旗鼓不辨日淹枕
席死亡未卜本鎮一身何足重輕如全省責任
何本鎮入粵五載無日不請告而軍門未允代
題今病勢日危情非得已只得瀝情再控伏乞憐

念代

題准放回籍調理等因到臣等看得黎岐甫爾戡定

海防正在汛期該鎮卽有積勞小恙奚妨在任
徐調牌行坐營官備呈該鎮查照去後又准該
鎮手本移稱先於本年二月二十日爲久病衰
軀重歷烟瘴生死旦暮乞賜准

題放歸以全殘喘以重地方事稱本鎮入粵卽病
無一歲不告乞休蒙兩院未准放行尚冀痊可
豈知日甚一日不惟舊病難支亦且新病疊至
毋論才綿力弱原無將帥之才卽近被人言亦
無厚顏就列濡滯時日之理萬祈軍門裁酌一

面委官代替一面具

題本鎮不敢徑行暫假民房少調病體待

命下卽行如不得已只得自行具疏等因呈詳奉總
督兩廣軍門批該鎮久動歸思屢爲地方勉強留
而適有黎之役致勤遠征討平二峒善後方殷
如何遽有此陳惟慎攝以共圖久安之畫繳時
聞本院臨蒞伊邇春防已屆不得不力疾督發
汎兵少候按臨懇請會

題茲據呈奉憲牌前因伏念本鎮推埋武夫荷蒙

聖恩歷次拔擢謬叨大將卽裹屍馬革濺血沙場死
有餘榮矣何敢託病求逸但年衰力憊病久血
枯醫生陳泰黃大倫等日夜醫療皆謂氣血兩
虛百勞久積若不靜攝恐非旦夕所能望起者
查得近日薊遼兩院代

題遼東總兵張承胤事例可比萬懇代

題放回原籍調治等因在此爲照該鎮患病乞休
情詞剴切隨行布政司會同按察司備查該鎮
所稱病勢日危是否情實乞照遼東總兵張承

亂事例兩院代

題放回調理事體有無相應可否准從會議停妥
通詳又奉總督兩廣軍門批據本鎮呈同前因
奉批仰廣東布政司同按察司會議通詳該本
司會同按察司看得鎮守廣東總兵王鳴鶴韜
鈴雅抱于胷中威望素服于閩外受推轂而鎮
全粵樹赤幟而奠海邦無論制節建牙攘夷之
謀略常裕卽其興師振旅平黎之勞緒居多肆
今抱由羅活等方雖叨仗以甫安而倭寇峒蠻

諸種尚潛伏而叵測調停善後元戎當與其謀
炳察幾先大將式專其任雖當破斧缺斨之餘
未免沐雨櫛風之困然忘身殉

國固臣義所宜然而因地留賢乃籌邊之石畫合
無請乞仍加勉留該鎮庶海徼得人彈壓而封
疆無意外之虞緣由通詳該臣復批該司會同
按察司勉留外本官又具呈懇稱本職之苦兩
司議詳尚欲留職雖爲地方盛心但職病終不
可起乞憐早放等因具詳督臣併將該司原詳

批該鎮因勞生病情誠有之但夷患甫寧善後
方殷豈宜弛肩僉議勉留洵爲至計惟是初請
之文未覆而該鎮催允至再至三情詞益迫仍
以義留不惟不恤其私而聽其日久杜門臥病
亦非所以爲地方計也仰司再酌通詳本官亦
將前情備移到臣隨看得本官稱病已久懇請
代

題不啻再三似爲勢不能已者又行該司會同按
察司備查王鳴鶴病勢是否纏綿未能速愈如

果情真不妨據實詳報以便會

題去後今據該司呈稱該本司左布政使柴應乾
會同按察司按察使董肇胤看得總兵王鳴鶴
籌邊宿望標柱雄風昔隨至以策勳茲積勞而
成瘁雖捐乃軀以報

國固蓋臣取義之圖然愛其身以有爲亦智士見
幾之識察其疾勢諒其衷情誠有不能旦夕居
處於斯者故與其羈抱病之身以希臥理孰若
遂遄歸之計以速更弦合無軫念該鎮乞歸非

僞俯賜代

題允其回籍調理竝

請點用新總勒限前來任事庶封疆料理得人而於
該鎮真切之情亦允愜矣等因到臣該臣議照
總兵王鳴鶴身居閩外責寄師中况以嶺海之
多虞固宜拮据以供職而本官自入粵以後無
歲不有乞歸之文督臣顧慮封疆責以大義雖
遷延歲月其神殊不王也屬以崖黎猖獗本官
義不自安督臣謂其曉暢軍事請於